

I puemi di Sonia


Quale dicia ch'è i giovani un anu primura pè a nostra lingua ?

Sonia Moretti un stà un ghjornu senza scrive. À l'appuntamentu di u mercuri ci hà purtatu tuttu l'annu u pegnu siguru di una scrittura matura di tecnica è zitella di speranza.

Caru tù

A porta trema appena
È trema la mio penna
D'abacu di pensieri
È d'aperti misteri
Sai tù
A larga piaga pientu
Frizzula à lu ventu
Di di, di dà, di dannu
Di scrittu l'andaccianu
A virtù
Di ciò ch'un hè usatu
Di ciò ch'face asgiatu
U pass'è veni ardente
À corsa d'incuscente
Certitù
Di e sazie filare
À l'andatura frusta
U fintu fuculare
Di sempiterna brusta
Varga tù
In la magra custerà
Di l'anima tranquilla
Duve ogni figliera
Dà parulla ch' sguilla
È quassù,
À l'altare di l'ore
Buscherai mottucci
À rinchere ci core
À ingannà i ciucci
Di ci tù
E fronde di a luna
Da tessè ne a funa
È legà e prumesse
E più linde scumesse
Di l'insù
Prumesse d'acu scrive
À riccamà un fogliu
Di bellezze inchjustrine
È nant'à u to sogliu
Lascia tù
E cantilene di l'estate
E rise mute di e fate
L'ale lanose di u to core
A vita vana di u more
Tandu tù

Feghja da quellu purtellinu
Chì s'avvieghja à capu chjinu
Un'ombra d'ombra à passu prestu
Chì piglierà à bracciu lestu
A to fortuna
E to perlucce di paese
E to cosucce cininette
I to passucci à fior' di mese
In li scrittucci fatti strette
À chjar'di luna
L'ombra averà palpebre aperte
Calata in un scornu di notte
È viderai e candilotte
Corre di so luce scuperte
È sappia tù
Chì issi pienti lampati
Isse gocce cincinate
Sò cascati à a mutesca
Cum'un'acquata fresca
Nant'à u libru spannu
Di u bellu, l'arcanu
Ch'è t'ai scrittu tù...



Sonia Moretti.

Vestiti

Vestu vezzi di pagnu
Vestu gnere di scure
Un gnignicu di neru
Un zinzicu di lagnu

Ma vestu gioia chjara
Di luce è d'albore
À stanciata calore
Nata in senu di fiara

U ricordu carucci
L'infucchetu di seta
L'abbracciu à ora cheta
Li facciu un bellu stucciu

À villutu d'amore
À memoria di lana
Cun bracce ninninanna
È u m'azzecu in core

Avviluppu e pene
Di lenu stracciu losciu
U lenzulacciu corciu
Piatta e stonde lene

Lena lena di ghjornu
Inghjallita à u sole
Capillera ch'bolle
Sopr'à capu d'annoiu

Per l'ore di quassù
Facciu fasciu d'estate
Arrubatu à e fate
À fior' di giuventù

È i passi à sulana
Ghjè quella terra calda
Ch'è i copre à l'amara
Di tempu ch'è c'inganna.